

摘藻堂四庫全書薈要

經部

欽定四庫全書薈要

經部  
儀禮集說卷十七



詳校官編修臣程嘉謨

欽定四庫全書蒼要卷二千三十六

經部

儀禮集說卷十七

元 敖繼公 撰

有司徹第十七

注曰少牢之下篇也

繼公謂此別為一篇及其名篇之意皆與既夕同

有司徹

徹直列反  
下並同

徹室中之饋及養者之豆爵與祝之薦俎也祝不自

執其俎以出是未歸也其二佐食乃衆賓為之室中  
事畢亦反於賓位然則祝與佐食皆當與賓尸之禮  
矣此時有司徹祝俎或設於堂下與主人於暮者之  
退亦反入於室及有司既徹則出立於阼階東也  
埽堂

注曰為賓尸新之

司宮攝酒乃餼尸俎

注曰餼溫也溫尸俎於爨所亦溫焉古文餼皆作尋



記或作燂春秋傳曰若可燂也亦可寒也

繼公謂皆示新之俎俎實謂尸前之羊魚豕及所加于所俎者也雍饗之所藝者固不止此是特為其已在俎者言之耳祝佐食亦與賓尸之禮其俎實不藝者以無上位略之但因其故俎而已

卒藝乃升羊豕魚三鼎無腊與膚乃設扃寫陳鼎于門

外如初

藝音尋又徐鹽反

注曰如初者如庑門之外東方北面北上

繼公謂少牢當五鼎此乃無腊與膚鼎者賓尸之禮  
膚不專俎而附於豕俎故是時亦不可以專鼎而惟  
附於豕鼎也然鼎數宜奇是以併去腊鼎而為三焉  
腊全不用者此禮貶於祭而腊又賤故略之

右新儋禮

乃議侑于賓以異姓

議侑于賓謂與賓長謀議可以為侑者也此與鄉飲  
酒就先生而謀賓介之意相類以異姓謂於衆賓之

中擇之也必異姓者以尸既同姓故侑須用異姓侑之言佑也所以輔助尸者也賓尸而立侑亦示敬尸之意且貴多儀也

### 宗人戒侑

注曰戒猶告也南面告於其位戒曰請子為侑侑出俟于廟門之外

注曰俟於次當與尸更入

### 右立侑

司宮筵于戶西南面

注曰為尸席也

又筵于西序東面

注曰為侑席也

尸與侑北面于席門之外西上

尸北面者尊大夫若不敢為賓客然也其位當在門外之西祭事已尸出門則不敢以尊自居西上賓位尚左也

主人出迎尸宗人擯

迎之而使宗人擯待賓之禮也賓客尸而迎之亦為祭事已

主人拜尸荅拜主人又拜侑侑荅拜

主人拜盖西面也荅拜者其皆東西與此拜皆再拜下文拜至亦然

主人揖先入門右尸入門左侑從亦左揖乃讓

亦三揖至於階乃三讓也惟云揖乃讓經文省亦以

其可知故也凡主人與客揖而先入皆入門右也經獨於此見之

主人先升自阼階尸侑升自西階西楹西北面東上尸侑升自西階尸升三等侑從之中等如上下射升階之儀也其降也亦然東上尸宜與主人相當也

主人東楹東北面拜至尸荅拜主人又拜侑侑荅拜拜至說見士昏禮

右迎尸侑

乃舉

注曰舉舉鼎也舉者不盥殺也

司馬舉羊鼎司士舉豕鼎舉魚鼎以入陳鼎如初

司馬二人司士四人也魚鼎重言舉明其與豕鼎異人也如初如其東方當序西面北上

雍正執一匕以從雍府執二匕以從司士合執二俎以從司士贊者亦合執二俎以從匕皆加于鼎東枋二俎設于羊鼎西西縮二俎皆設于二鼎西亦西縮

注曰凡三匕鬲一匕四俎為尸侑主人主婦其二俎設于豕魚鬲之西陳之宜具也

繼公謂一匕羊匕也二匕豕魚匕也四俎乃尸侑主人主婦之羊俎也設之亦北上如鬲之序然其載之亦先北而後南也此皆羊俎其二乃在豕魚鬲西者但欲使鬲前皆有俎耳不嫌其所載者異也羊鬲西特有二俎尊之也此執匕以少者為貴設俎以多者為尊亦宜也



雍人合執二俎陳于羊俎西並皆西縮覆二䟽匕于其

上皆縮俎西枋

覆芳服反  
下並同

注曰䟽匕匕柄有刻飾者

繼公謂羊俎指在羊鼎西者也此二俎陳于其西亦  
北上其北俎次賓以羞羊匕涪豕匕涪其南俎司馬  
以羞羊肉涪司士以羞豕脊涪魚䟽匕二者羊豕之  
涪宜異器也覆者為塵也二匕覆于二俎之上羊匕  
在北豕匕在南南非匕涪之俎亦覆匕于其上者事

未至權加之耳此俎將載則更以豕匕加于其北俎  
既則反之縮俎西枋為縮執俎者在西也

右陳設鼎俎於內

主人降受宰几尸侑降主人辭尸對

為尸受几故尸從降侑亦降者從尸也凡尸為禮之  
類此者侑則從之此所以謂之侑也與

宰授几主人受二手橫執几揖尸

几自東壁來其授受於阼階東與獨揖尸尸尊也聘

禮公受几於序端

主人升尸侑升復位

注曰位阼階賓階上位

主人西面左手執几縮之以右袂推拂几三二手橫執  
几進授尸于筵前

推拂謂外拂之推者推手也

尸進二手受于手間

案聘禮曰賓進訝受几于筵前此亦訝受也乃云手

間者但言其疏數之節耳此授受者皆橫執几而二  
手之間有廣狹則凡賓主之橫執几者二手共執其  
一廉明矣

主人退尸還几縮之右手執外廉北面奠于筵上左之

南縮不坐

還音旋

主人退復位也還几還而易執之也縮執几亦用二  
手此惟云右手執外廉特見其一耳右廉而謂之外  
者以其差遠於人故也几稍高故設之不坐少儀曰

取俎設俎不坐其意類此

主人東楹東北面拜

注曰拜送几也

尸復位尸與侑皆北面答拜

注曰侑拜者從於尸

繼公謂至此尸乃復位則是主人拜時尸在筵前東面也聘禮曰賓進訝受几於筵前東面俟公壹拜送此異於彼者先奠几與飲酒而授几其禮重故侑亦

拜荅拜之文主於尸也

右授几

主人降洗尸侑降尸辭洗主人對卒洗揖主人升尸侑升

辭對之儀見鄉飲酒故此略之揖亦主人揖尸也文省耳下放此

尸西楹西北面拜洗主人東楹東北面奠爵荅拜降盥尸侑降主人辭尸對卒盥主人揖升尸侑升主人坐取

爵酌獻尸尸北面拜受爵主人東楹東北面拜送爵  
獻受之儀亦當如鄉飲酒禮

右主人獻尸

主婦自東房薦韭菹醢坐奠于筵前菹在西方婦贊者  
執昌菹醢以授主婦主婦不興受陪設于南昌在東方  
興取籩于房禮黃坐設于豆西當外列禮在東方婦贊  
者執白黑以授主婦主婦不興受設於初籩之南白在

西方興退

趨芳  
中反

注曰昌昌本也韭菹醢醢昌本麋糒麋熬麥也蕡蕡熬泉實也白熬稻黑熬黍主婦取籩與者以饌異親之當外列辟劍也退退入房也

繼公謂四豆四籩放室中之數也賓尸以飲酒為主其禮變於饋食不可復因其薦故於其始亦變而用朝事之豆籩焉不辟君禮者變而用之無嫌也當外列麴在麋糒西也

右主婦薦尸豆籩



乃升

注曰升牲體於俎也

司馬牝羊亦司馬載載右體肩臂肫胙肫正脊一脰脊  
一橫脊一短脅一正脅一代脅一腸一胃一祭肺一載  
于一俎

注曰一俎謂司士所設羊鼎西第一俎

繼公謂二司馬即舉羊鼎者也以下凡升羊者皆司  
馬為之特於此見之耳上言藝尸俎而此肩臂肫胙

胙具有明其神俎肝俎並用也復序俎實者其數及載與進俎之法皆有異於上故爾是言載時先後之序也其在俎則與正祭者略同惟臠後於胙為異耳臠後於胙者以其折也折之則不為全體而在全體之下矣臠必折者見其貶於神俎且欲以所折者為肉湑俎也其脊脅皆一骨及腸胃各一者義亦如之賓尸主於飲酒此俎乃有祭肺者盛之一俎謂司士所設羊鼎西之北俎也司馬亦南面執之以載與他

俎異也既載則侑主人主婦之羊俎三亦繼此而序  
載之每俎既載則遷之於阼階西亦北上西縮俟時  
乃設耳所以然者為當進羊匕滷羊肉滷於尸也北  
當作匕下同

羊肉滷臠折正脊一正脅一腸一胃一膾肺一載于南  
俎

注曰肉滷肉在汁中者也必云臠折明為上所折分  
者膾肺離肺也南俎雍人所設在南者

繼公謂云臠折者明其為臠之下也此臠蓋與後足之轂同以無異名故但云臠折而已羊俎之外又分其體以為此俎貴多儀也尊尸不敢用左體故分右臠為之用臠肺亦別於其正羊肉滫與羊俎之實同鼎而名不同以其於鼎有滫上滫中之異也羊俎西之二俎亦北上肉滫載於南俎則其北俎為羞匕滫明矣凡羊肉滫與豕胄滫魚皆俟時而載因升正俎之節而遂見之欲其文相比也

司士牝豕亦司士載亦右體肩臂肱髀腠正脊一脰脊  
一橫脊一短脅一正脅一代脅一膚五膂肺一載于一  
俎

此謂豕脅也二司士即舉豕鬲者也此下凡升豕者  
皆此司士為之豕無正俎故此尸俎之體骨皆放於  
羊俎此俎與羊肉清俎同腠在脰下是亦折矣

侑俎羊左肩左肱正脊一脅一腸一胃一切肺一載于  
一俎侑俎豕左肩折正脊一脅一膚三切肺一載于一

俎

注曰切肺亦祭肺互言之爾

繼公謂脩無羊肉滑故羊俎得用二體前體以肩後體以肫導之也右體皆在尸俎故此皆用左焉有肩有肫則肫在下端矣羊俎亦用祭肺者與尸俎同在堂上因其禮也阼俎亦然飲酒正禮祭以離肺其有以切肺者或盛之或有為加之或相因用之非常禮也豕左肩折不用全體為羊俎已用二故於此殺之

豕胥體數殺於羊俎又無羊肉湑皆下尸也豕胥之肺宜如羊肉湑而用濟此乃放羊俎而用切者亦以無羊肉湑故也侑之羊俎司士所設在羊鼎西之南者侑之豕俎與尸之豕胥同用南俎

阼俎羊肺一祭肺一載于一俎羊肉湑臂一脊一脅一腸一胃一濟肺一載于一俎豕胥臂一脊一脅一膚三濟肺一載于一俎

注曰臂左臂也阼俎司士所設豕鼎西俎也

繼公謂尸之牲俎三主人亦如之故其正俎無體遠下尸也骨之屬但用肺而已臂不言左者可知也正俎太賤故加俎宜用尊體其脊脅之屬亦不嫌於與尸同也侑正俎用肩主人之加俎乃用臂蓋示其不相統之意豕脊猶言豕俎也不言肉漬者一俎而已無所別異也豕脊體數乃放羊肉漬者亦以羊俎太簡故爾此羊肉漬豕脊皆用雍人所設之南俎與尸

同



主婦俎羊左臠脊一脅一腸一胃一膚一膾羊肺一載  
于一俎

注曰言膾羊肺者文承膚下嫌也其俎司士所設在  
魚鼎西者

繼公謂主婦有正俎而無豕脰下脩也必用膚者明  
其可用豕脰而不用也亦與阼俎惟用羊肺之意相  
近用膾肺者此俎設於房中故不因堂上之禮膚在  
膾羊肺上未詳

司士牝魚亦司士載尸俎五魚橫載之侑主人皆一魚亦橫載之皆加膾祭于其上

膾火吳反  
鄭又音哱

注曰橫載之者異于牲膾讀如殷哱之哱剝魚時割其腹以為大臠可用祭也

繼公謂二司士舉魚鼎者也橫載之亦縮俎其於載者則為橫此益送魚肉之俎載時皆橫執之與羞之時異於斯見之矣凡經言載俎之例惟云橫載者據俎而言也加以之字者據載者而言也此三羞濟

魚亦皆迭用南俎北亦當作匕

右通言載俎之法

卒升

謂已升四羊俎也

賓長設羊俎於豆南賓降尸升筵自西方坐左執爵右  
取韭菹揅于三豆祭于豆間尸取醴蕢宰夫贊者取白  
魚以授尸尸受兼祭于豆祭

長之  
丈反

注曰賓長上賓

繼公謂賓長設俎尊尸之正俎也阼俎亦然云賓降見尸升之節也既祭則右執爵於尸升筵主人亦疑立于阼階東

雍人授次賓䟽匕與俎受于鼎西左手執俎左廉縮之卻右手執匕枋縮于俎上以東面受于羊鼎之西司馬在羊鼎之東二手執挑匕枋以挹淥注于䟽匕若是者

三

挑湯堯反鄭音  
由挹一入反

注曰挑謂之軟讀如或舂或枕之枕此二匕者皆有

淺升狀如飯揅挑長枋可以抒物於器中者注猶寫也今文挑作挑

繼公謂䷗與俎在羊俎西之北者也䷗清尊於肉清故用上俎羞之陳俎時俎西縮䷗縮俎西枋而此左手執左廉卻右手執䷗枋以受清是身當俎下端也然則凡縮執俎者皆當其下端矣左手執俎左廉乃縮之是授受時皆橫執俎也縮執俎以受于鼎西者惟此與豕䷗清耳二手執挑䷗枋敬其事不游

手也挹濟且若是則匕牲體者可知

尸興左執爵右取肺坐祭之祭酒興左執爵

注曰肺羊祭肺

繼公謂言興左執爵明其右執爵以興也下文皆然  
次賓縮執匕俎以升若是以授尸尸卻手受匕枋坐祭  
濟之興覆手以授賓賓亦覆手以受縮匕于俎上以降  
若是者謂執匕俎之儀無變也卻手受匕枋則匕內  
鄉而便於用覆手以授賓明其變於有事之時次賓

亦覆手以受統於尊者也縮俎則不復執之而二手執俎矣祭清如祭酒然亦注於地他時清不祭此祭者重其在俎也清與肉清相將之物故以此先肉清而進之

尸席末坐啐酒興坐奠爵拜告曰執爵以興主人北面于東楹東答拜

拜告曰不降筵以有後事也云主人北面于東楹東明其復位下放此

司馬羞羊肉滑縮執俎尸坐奠爵興取肺坐絕祭齊之  
興反加于俎司馬縮奠俎于羊滑俎南乃載于羊俎卒  
載俎縮執俎以降

縮執俎者既載則錯而改執之也載時橫執之尸奠  
爵亦于左宜辟羞俎者後滑字衍司馬北面縮奠俎  
既則西面于俎東載之

尸坐執爵以興次賓羞羊燔縮執俎縮一燔于俎上鹽  
在右尸左執爵受燔換于鹽坐振祭齊之興加于羊俎



賓縮執俎以降

室中之事無燔俎故此與亞獻皆用之受燔取于俎也

尸降筵北面于西楹西坐卒爵執爵以興坐奠爵拜執爵以興主人北面于東楹東答拜主人受爵尸升筵立于筵末

右主人獻尸禮卒

主人酌獻侑侑西楹西北面拜受爵主人在其右北面

荅拜

獻侑亦於席前西南面也侑既拜則進受之以復位  
主人既拜則立于西階東及侑降筵北面則復就其  
右

主婦薦韭菹醢坐奠于筵前醢在南方婦贊者執二簋  
饗以授主婦主婦不興受之奠饗于醢南贊在饗東  
主婦入于房

醢在南方是豆北上也豆北上者以席南上也主人

席豆相變之法於斯見之矣下云侑升筵降筵自北方是席南上也主婦薦豆而贊者即贊籩者兩豆兩籩同時設故不必親取籩

侑升筵自北方司馬橫執羊俎以升設于豆東

凡正俎皆橫執此乃明言之者以司馬進之嫌亦縮執也

侑坐左執爵右取菹換于醢祭于豆間又取麴蕢同祭于豆祭興左執爵右取肺坐祭之祭酒興左執爵次賓

羞羊燔如尸禮

不啐酒者凡堂上每獻啐酒之節皆當放於尸上禮尸  
齊湑乃啐酒此無湑則不宜啐酒以異其節侑無  
羊匕湑者以無肉湑故也

侑降筵自北方北面于西楹西坐卒爵執爵以興坐奠  
爵拜主人答拜

注曰答拜拜於侑之右

右主人獻侑

尸受脩爵降洗脩降立于西階西東面主人降自阼階  
辭洗尸坐奠爵于篚興對

尸適洗南北面主人阼階東南面辭洗尸對主人復  
阼階東西面

卒洗主人升尸升自西階主人拜洗尸北面于西楹西  
坐奠爵答拜降盥主人降尸辭主人對卒盥主人升尸  
升坐取爵酌

主人亦揖乃升與前後之儀同不言者可知也脩不

升辟酢禮也與尸同升則嫌若同酢主人然

司宮設席于東序西面主人東楹東北面拜受爵尸西楹西北面答拜

事至乃設席略倣室中致爵之節亦所以尊尸侑也  
既設席尸乃於席前東南面酢主人主人拜受爵復  
位

主婦薦韭菹醢坐奠于筵前菹在北方婦贊者執二籩  
醢贊主婦不興受設醢于菹西北贊在醢西主人升筵

自北方主婦入于房

注曰設籩于道西北亦辟鉤

繼公謂主人之席亦南上而道在北方豆席相變之法愈可見矣升筵之節侑速於尸主人速於侑皆所以示其異

長賓設羊俎于豆西主人坐左執爵祭豆籩如侑之祭興左執爵右取肺坐祭之祭酒興次賓羞匕涪如尸禮席未坐啐酒執爵以興司馬羞羊肉涪縮執俎主人坐

莫爵于左興受肺坐絕祭齊之興反加于清俎司馬縮  
奠清俎于羊俎西乃載之卒載縮執虛俎以降

祭酒興亦左執爵乃受匕清奠爵于左辟肉清俎也  
受肺亦取於俎言受者執俎以進亦授也故取之云  
受言虛俎者見其盡載於羊俎而無所釋也此經言  
羞清俎一節其文有加尸者所以足其義非異也  
主人坐取爵以興次賓羞燔主人受如尸禮  
燔不言羊可知也



主人降筵自北方北面于阼階上坐卒爵執爵以興坐  
奠爵拜執爵以興尸西楹西答拜主人坐奠爵于東序  
南脩升尸脩皆北面于西楹西主人北面于東楹東再  
拜崇酒尸脩皆答再拜主人及尸脩皆升就筵

此尸酢主人主人拜崇酒而脩亦答拜者緣主人意  
亦欲并謝已也云主人及尸脩先後之辭也後文放  
此升就二字宜衍其一

右尸酢主人

司宮取爵于篚以授婦贊者于房東以授主婦

注曰房東房戶外之東

繼公謂以授主婦婦贊者以授主婦于房中也上篇  
亞獻畢主婦以爵入于房令司宮乃取爵于下篚以  
授者其有司徹之後此爵又反於下篚與

主婦洗于房中出實爵尊南西面拜獻尸尸拜于筵上  
受

注曰尊南西面拜由便也

繼公謂尸拜于筵上受以其殺於主人且因室中之禮也後三獻放此

主婦西面于主人之席北拜送爵入于房取一羊釧坐奠于韭菹西主婦贊者執豕釧以從主婦不興受設于羊釧之西興入于房取糗與股脩執以出坐設之糗在簋西脩在白西興立于主人席北西面

主人席北此時主婦堂上之正位也飲酒而有釧尸尊亦盛之設二簋而主婦親取之以其與釧異類不

可相因也糗與脩雜用饋食之籩也去棗用脩以示其變糗脩北上明不與初儀序下儀類此

尸坐左執爵祭糗脩同祭于豆祭

於此乃云尸坐是受爵時立也祭糗脩之祭當如下文作取蓋字誤也

以羊釧之柶扱羊釧遂以扱豕釧祭于豆祭祭酒

祭釧乃祭酒者是禮初獻祭酒之節居其祭之四三獻居其祭之二故於此特居其祭之三以序之且示

禮殺有漸也

次賓羞豕匕涪如羊匕涪之禮

如者如其左手執俎左廉以下之儀其異者次賓自縮執匕俎以受雍人不復授之也羞豕匕涪亦用羊匕涪之俎其匕則殊乃鼎之覆于羊俎西之南俎之上者也將羞此涪則以羊匕與之易處焉既則各反之

尸坐啐酒左執爵嘗上鉶執爵以興坐奠爵拜主婦答

拜執爵以興

此嘗釂拜也不告旨異於主人也特牲饋食禮曰尸祭釂嘗之告旨主人拜尸荅拜

司士羞豕胥尸坐奠爵興受如羊肉滑之禮坐取爵興奠爵亦於左

次賓羞豕燔尸左執爵受燔如羊燔之禮坐卒爵拜主婦荅拜受爵

受爵亦於其席也下文放此

右主婦獻尸

酌獻侑侑拜受爵主婦主人之北西面答拜

亦拜于筵上受盖不敢異於尸不言者可知也北亦席北

主婦羞糗脩坐奠糗于甋南脩在簣南侑坐左執爵取糗脩兼祭于豆祭

無釂亦殺也不祭酒者上禮尸祭釂乃祭酒此無釂則不祭酒其義與上不啐酒同

司士縮執豕膏以升侑興取肺坐祭之司士縮奠豕膏于羊俎之東載于羊俎卒乃縮執俎以降侑興

取肺亦右取之肺謂切肺豕膏無清者初獻無羊清故此雖有豕膏亦不用清也

次賓羞豕燔侑受如尸禮坐卒爵拜主婦答拜受爵如尸禮亦如受羊燔之禮也

右主婦獻侑

酌以致于主人主人筵上拜受爵主婦北面于阼階上



荅拜

筵上受因尸禮也北面荅拜放室中之儀也與主人行禮故亦得獨拜於阼階上

主婦設二釂與糗脩如尸禮主人其祭糗脩祭釂祭酒受豕匕清啐酒皆如尸禮嘗釂不拜

有釂者阼俎如尸故釂亦因之設二釂羊在菹北豕在羊北設糗脩糗在甗北脩在蕢北此啐酒為將嘗釂也嘗釂不拜釂已物也言此以別於尸禮

其受豕脊受豕燔亦如尸禮坐卒爵拜主婦北面答拜受爵

右主婦致爵于主人

尸降筵受主婦爵以降

主婦受爵尸即降筵主婦以尸將受已爵也其西面于主人之北以待之與

主人降侑降主婦入于房

侑主人降從尸也主婦入于房尸降為已宜辟之也

凡婦人於丈夫之為已而降洗者例無徒降之禮蓋於此篇及士昏禮見之矣

主人立于洗東北西面脩東面于西階西南

設洗當東榮而主人降位在阼階東直東序則宜西於洗北又上文脩降立于西階西此亦從降也而主人云洗東北脩云西階西南未詳疑文有誤衍也

尸易爵于篚盥洗爵

易爵酢主婦因室中之禮也

主人揖尸侑

亦異揖之於此乃并揖侑者以鄉者尸酢主人之時  
侑不升故也必揖之使升者尸酢之意已見於前今  
無嫌也

主人升尸升自西階侑從主人北面立于東楹東侑西  
楹西北面立

以尸方行禮宜俟之

尸酌主婦出于房西面拜受爵尸北面于侑東答拜主

婦入于房

西面亦於主人席北蓋尸亦就此位而酢之

司宮設席于房中南面主婦南面立于席西

既受爵乃設席降於主人也席南面變於不賓尸之  
禮也立于席西者亦西為下未設豆而立席西亦異  
於上

婦贊者薦韭菹醢坐奠於筵前菹在西方婦人贊者執  
麴黃以授婦贊者婦贊者不興受設麴于菹西黃在麴

南

注曰婦人贊者宗婦之少者

主婦升筵司馬設羊俎于豆南主婦坐左執爵右取菹  
換于醢祭于豆間又取麴蕡兼祭于豆祭主婦奠爵興  
取肺坐絕祭臠之興加于俎坐拱手祭酒啐酒

注曰拱手者于帨帨佩巾內則曰婦人亦左佩紛帨  
繼公謂凡祭離肺者必拱手經不盡見之也

次賓羞羊燔主婦興受燔如主人之禮主婦執爵以出

于房西面于主人席北立卒爵執爵拜尸西楹西北面  
荅拜主婦入立于房尸主人及侑皆就筵

出房卒爵宜成禮於所酢者之前也立卒爵婦人常  
禮也立卒爵而拜既惟人君及主婦耳其異者奠爵  
與執爵也燕禮曰公立卒爵坐奠爵拜云立于房見  
其不就席

右尸酢主婦

上賓洗爵以升酌獻尸尸拜受爵賓西楹西北面拜送

爵尸奠爵于薦左賓降

注曰上賓賓長也或謂之長賓奠爵爵止也

繼公謂拜受爵亦於筵上也尸於三獻而奠爵亦欲助祭者皆受獻也薦左醢東也不奠於右為妨往來及行禮也

右上賓獻尸爵止

主人降洗解尸侑降主人奠爵于篚辭尸對卒洗揖尸升侑不升



侑不升者酬禮不及已升嫌也

主人實觶酬尸東楹東北面坐奠爵拜尸西楹西北面  
荅拜坐祭遂飲卒爵拜尸荅拜降洗尸降辭主人奠爵  
于篚對卒洗主人升尸升主人實觶尸拜受爵主人反  
位荅拜尸北面坐奠爵于薦左尸侑主人皆升筵

卒洗亦揖乃升主人實觶亦北面于尸之席前尸階  
上拜乃進受之而反位主人既荅拜尸乃進北面奠  
爵薦左其昌本之東與酬而授觶者大夫之禮異於

士也主人於尸爵止之後即舉觶以酬尸者宜終尸禮乃可以獻助祭者也侑升堂之節其在尸奠爵之時乎

右主人酬尸尸奠酬

乃羞宰夫羞房中之羞于尸侑主人主婦皆右之司士羞庶羞于尸侑主人主婦皆左之

注曰房中之羞其籩則糗餌粉飧其豆則醢食糝食繼公謂房中之羞饌于房者也言房中以別於庶羞

明庶羞不自房來也饋食之禮庶羞亦設于薦豆之左則庶羞在左乃其常處庶羞左則內羞右亦宜矣庶羞之物恐亦不過載醢而已案注以羞籩羞豆之實為此房中之羞亦恐或然但未必其俱用之也

右羞于尸侑主人主婦

主人降南面拜衆賓于門東三拜衆賓門東北面皆答壹拜

主曰拜于門東明少南就之也

繼公謂助祭之賓主黨也故主人降拜之而尸侑不從與鄉飲鄉射之禮異也未獻之前衆賓位在門東亦大夫之禮異於士者主人三拜旅衆賓衆賓各一拜大夫士之禮同

主人洗爵長賓辭主人奠爵于篚興對卒洗升酌獻賓于西階上長賓升拜受爵主人在其右北面答拜

長賓辭亦北面蓋於門東少進也主人已酌長賓乃升遠下尸也獻賓當西南面

宰夫自東房薦脯醢醢在西

醢在西者為降設於其位則脯當在南也賓位於庭北上而脯醢南上亦席豆相變之意也由是言之則他禮之類此者皆可得而推矣

司士設俎于豆北羊胾一腸一胃一切肺一膚一

注曰羊胾羊左胾薦與設俎者既則俟于西序端

繼公謂上賓一體又無脊脅遠別於堂上者也用切肺者賓俎設於堂故亦因尸禮肺繼胃言之羊肺可

知

賓坐左執爵右取脯換于醢祭之執爵興取肺坐祭之  
祭酒遂飲卒爵執以興坐奠爵拜執爵以興主人荅拜  
受爵賓坐取祭以降西面坐委于西階西南

注曰成祭於上尊賓也取祭以降反下位也反下位  
而在西階西南已獻尊之祭脯肺

繼公謂賓取祭以降以已所有事者也宜親執之西  
階西南賓之正位也既獻乃立於此尊者之禮節文

彌多以相變為貴執以興似脫一爵字

宰夫執薦以從設于祭東司士執俎以從設于薦東

此設薦于祭東則是凡祭于豆間乃當其間之前耳  
此獻長賓而宰夫司士薦則自此以下皆私人為之  
明矣宰夫司士大夫之私人也

衆賓長升拜受爵主人荅拜坐祭立飲卒爵不拜既爵  
宰夫贊主人酌若是以辯辯受爵

宰夫贊酌大夫尊也贊酌者主人以虛爵授宰夫宰

夫為酌之於此乃言之者見獻賓一人乃贊酌也若是以辯謂皆如衆賓長升拜受爵以下之儀言辯受爵嫌或不與者也

其薦脯醢與胾設于其位其位繼上賓而南皆東面其胾體儀也

注曰亦宰夫薦司士胾用儀者尊體盡儀度餘骨可用而用之今文儀皆作犧

繼公謂特牲饋食禮曰衆賓升拜受爵坐祭立飲薦



俎設于其位辯此下經言兄弟之儀云升受爵其薦  
胥設于其位然則此薦胥亦於每獻設之也體儀謂  
或體或儀也尊者用體折卑者但用儀且儀者其脊  
若胥之屬與又下云長兄弟之胥折胥一膚一則此  
非折而儀者惟有膚而已

右主人獻賓

乃升長賓主人酌酢于長賓西階上北面賓在左  
注曰言升長賓則有贊者為之

繼公謂乃升長賓者其宗人與後長賓二字似衍蓋此乃主人自酢非酢于長賓也鄉飲酒曰主人實爵以酢于西階上此文宜類之徧獻乃酢變於士禮賓辟尸不敢親酢主人故主人自酢以達其意

主人坐奠爵拜執爵以興賓答拜坐祭遂飲卒爵執爵以興坐奠爵拜賓答拜賓降

注曰降反位

繼公謂賓降反位則主人亦就席矣

右主人自酢

宰夫洗觶以升主人受酌降酬長賓于西階南北面賓  
在左主人坐奠爵拜賓荅拜坐祭遂飲卒爵拜賓荅拜  
注曰宰夫授主人觶則受其虛爵奠于篚

繼公謂宰夫授觶于上便其酌也此亦異於士

主人洗賓辭主人坐奠爵于篚對卒洗升酌降復位賓  
拜受爵主人拜送爵賓西面坐奠爵于薦左

位西階南之位也以特牲禮例之此時當西面乃云

復位未詳主人拜亦北面也賓西面奠爵于薦左由便說見特牲禮薦左薦北

右主人酬賓

主人洗升酌獻兄弟于阼階上兄弟之長升拜受爵主人在其右荅拜坐祭立飲不拜既爵皆若是以辯辯受爵

獻兄弟不殊其長與衆賓同亦大夫禮異也不言宰夫贊主人酌畧其文耳兄弟卑於衆賓主人於其次

者不親酌可知下獻內賓放此此獻亦西南面  
其位在洗東西面北上升受爵其薦胥設于其位

又著兄弟長以下既獻之位及其設薦胥之節也至  
此乃言其位者因文而見之也升受爵謂每人升受  
爵之時也於其受獻則為之設薦胥于位明不俟其  
降也鄉飲酒禮衆賓每一人獻則薦諸其席是禮似  
之矣此不言宰夫贊酌獻衆賓不言升受爵而設薦  
胥其禮同故互文以相足也

其先生之胥折胥一膚一其衆儀也

注曰先生長兄弟

繼公謂胥猶俎也其折與胥若羊若豕則不可攷先生胥折其衆則儀亦以此別長幼也無離肺者因上賓俎也俎不設於堂故無切肺

右主人獻兄弟

主人洗獻內賓于房中南面拜受爵主人南面于其右荅拜坐祭立飲不拜既爵若是以辯亦有薦胥

注曰內賓姑姊妹及宗婦獻于主婦之席東南面於其右主人之位恒左人亦設薦胥於其位特牲饋食禮記曰內賓立于房中西墉下東面南上宗婦北堂東面北上

繼公謂洗不言降是洗于房也獻之蓋東北面受送之拜皆南面猶堂上之皆北面也是或一禮與若是以辯亦謂長幼拜受以下之儀同也不言辯受爵已於衆賓兄弟見之此可知也不著其位者嫌未獻既

獻之位異也

右主人獻內賓

主人降洗升獻私人于阼階上拜于下升受主人荅其  
長拜乃降坐祭立飲不拜既爵若是以辯宰夫贊主人  
酌主人於其羣私人不荅拜其位繼兄弟之南亦北上  
亦有薦胾

注曰初亦北面在衆賓之後爾凡獻位定

繼公謂私人猶私臣也經記異人故其文亦異獻私



人而降洗重獻禮也拜于下而降飲賤也獻亦西南  
面於東楹東而拜於其右私人賤故但荅其長拜以  
殊之自獻衆賓至此其獻凡四節惟前後兩言宰夫  
贊主人酌所以見其間二獻之不言此者為省文耳  
此言於若是以辯之後見獻私人之長即贊之也以  
是例之則獻內賓以上主人所親酌者惟於其長益  
可見矣此位亦北上者賤於兄弟故其位繼其後而  
不更端也特牲記言衆賓及衆兄弟內賓宗婦公有

司私臣其俎同然則此禮內賓以及私人其俎亦皆儀而有膚矣大夫無獻公有司之禮豈其私臣多足以任其事不用公有司與或公有司在衆賓之中不必別見之與

右主人獻私人

主人就筵尸作三獻之爵

注曰上賓所獻爵

繼公謂主人畢獻而就筵三獻於是升立於西階上

尸乃舉爵也此與不賓尸之禮皆尸自作止爵不待獻者作之亦異於士

司士羞滑魚縮執俎以升尸取膾祭祭之祭酒卒爵注曰不差魚亡滑略小味也羊有正俎羞亡滑肉滑豕無正俎魚無亡滑隆污之殺

繼公謂不言左執爵與興坐者如上禮可知

司士縮奠俎于羊俎南橫載于羊俎卒乃縮執俎以降尸奠爵拜三獻北面荅拜受爵

橫載者於俎為橫與牲體同也不縮載者正俎之實已多又加以益送之俎故載魚於此不得象其在魚俎也尸既卒爵乃執虛爵以待執俎者降而後奠爵拜行禮之序於此可見

右尸作止爵

酌獻侑侑拜受三獻北面答拜司馬羞滑魚一如尸禮卒爵拜三獻答拜受爵

司馬當作司士字之誤也上下皆司士為之此不宜

使司馬且司馬惟主羊俎耳羞滑魚非其事也卒爵  
與拜其節宜與尸同此略言之耳下文主人亦然  
酌致主人主人拜受爵三獻東楹東北面答拜司士羞  
一滑魚如尸禮卒爵拜三獻答拜受爵

致下羞脫于字也賓拜東楹東者以與主人為禮則  
不敢獨拜西階上辟尸也此與侑如尸禮皆兼祭酒  
而言不致爵于主婦寢於不賓尸之禮

右上賓獻侑致于主人

尸降筵受三獻爵酌以酢之

注曰既致于主人尸乃酢之遂賓意

繼公謂賓尸則尸與侑主人為序故俟其畢獻乃酢之酢而不洗亦因室中之禮也賓尸而不因室中之禮者惟主人耳

三獻西楹西北面拜受爵尸在其右以授之尸升筵南面答拜坐祭遂飲卒爵拜尸答拜執爵以降實于筐

尸在其右並授也並授而不同面拜遠辟主人獻賓

之禮也云執爵以降則是既卒爵亦奠之而拜矣

右尸酢上賓

二人洗觶升實爵西楹西北面東上坐奠爵拜執爵以興尸侑荅拜坐祭遂飲卒爵執爵以興坐奠爵拜尸侑荅拜皆降

二人舉觶為旅酬始也中庸曰旅酬下為上所以逮賤也其是之謂與

洗升酌反位尸侑皆拜受爵舉觶者皆拜送侑奠觶

于右

反位于西楹西俟拜也受爵亦於其席拜送亦於其位舉解者不奠解于席前不變於主人之儀也侑奠解不言坐文省也于右亦由便耳右糗南

右二人舉解于尸侑

尸遂執解以興北面于阼階上酬主人主人在右

言遂執解以興是鄉者亦執解以坐而俟也尸雖不奠解猶坐以其當然也



坐奠爵拜主人荅拜不祭立飲卒爵不拜既爵酌就于阼階上酬主人

亦執觶興主人乃荅拜也此酬主人謂東面授之如特牲賓兄弟旅酬之儀

主人拜受爵尸拜送尸就筵主人以酬侑于西楹西侑在左坐奠爵拜執爵興侑荅拜不祭立飲卒爵不拜既爵酌復位侑拜受主人拜送主人復筵

復位而西面授之下放此

乃升長賓侑酬之如主人之禮

注曰遂旅也

至于衆賓遂及兄弟亦如之皆飲于上

注曰上西階上

遂及私人拜受者升受下飲

私人拜而升受兄弟之爵俟兄弟答拜乃下也下飲  
謂就其位而飲之以酬其次者也惟云拜受云下飲  
是兄弟及私人飲時皆不拜矣兄弟飲不拜者以所

酬者在下難為禮也私人飲不拜者因酬已者之儀  
且賤者禮簡也

卒爵升酌以之其位相酬辯

注曰其位兄弟南位亦拜受拜送升酌由西階

繼公謂以之其位飲所酬者也亦於此相酬則私人  
之長其下飲之時亦在此明矣

卒飲者實爵于篚

注曰未受酬者雖無所旅猶飲

右旅酬

乃羞庶羞于賓兄弟內賓及私人

無房中之羞別於主婦以上也此節亦當祭薦胥文  
不具耳此羞同時羞則兄弟酌以相酬之時房中亦  
旅

右羞于堂下及房中

兄弟之後生者舉觶于其長

注曰後生年少也

洗升酌降北面立于阼階南長在左坐奠爵拜執爵以興長答拜

此後生者舉觶與主人酬賓之儀略同似有為主人酬長兄弟之意故位如主人而長在左

坐祭遂飲卒爵執爵以興坐奠爵拜執爵以興長答拜長既拜則復于東面位也

洗升酌降長拜受于其位舉爵者東面答拜爵止

此拜受于其位者別於主人之親酬是亦變於士也

酬而受爵因賓禮也東面答拜宜鄉之爵止奠之於薦左也以其未即舉故言止亦省文

右兄弟之後生者舉觶于其長

賓長獻于尸如初無滑爵不止

注曰如初如其獻侑酌致于主人受尸酢也無滑爵不止別不如初者

繼公謂賓長衆賓長即次賓也但言賓長者亦獻于尸不嫌與三獻者同也此獻當用觶不言者文省耳

特牲饋食禮長兄弟於三獻之後洗觚為加爵此節與之同器亦宜同也上篇實觚于篚其為此用與不使兄弟不稱加爵大夫禮異也湑謂湑魚

右次賓獻致如初

賓一人舉爵于尸如初亦遂之于下

注曰遂之于下者遂及賓兄弟下至于私人

繼公謂賓一人次賓之次者也舉爵即舉觥也如初如二人舉觥于尸侑之儀其異者不及侑耳亦上文

尸酬主人以下之禮

右賓一人舉觶于尸遂旅酬

賓及兄弟交錯其酬皆遂及私人爵無筭

言皆遂及私人則是賓及兄弟之奠爵先後迭舉而不並行也其禮則賓長取觶酬兄弟長交錯以辯不拜私人之卒飲者洗酌反之長兄弟乃取觶酬賓長亦交錯以辯卒飲者亦洗酌反之賓與兄弟又皆迭舉如初禮爵行無數至醉而止賓尸至於飲酒而堂



上不行無筭爵者此雖變於祭禮然尸猶有餘尊不宜無所別異無筭爵之儀太簡不崇敬

右堂下相酬爵無筭

尸出侑從主人送于廟門之外拜尸不顧

送尸于廟門外以其賓之也此云不顧見士於大夫之禮也

拜侑與長賓亦如之衆賓從

從從長賓也

司士歸尸侑之俎

尸侑尊司士徹俎而歸之賓長而下則自徹而授其人以歸

主人退

注曰反於寢也

有司徹

徹徹俎與堂上下之薦羞之屬也婦人不徹則其所徹者不以入于房與

右尸出禮畢

若不賓尸

此下之禮視賓尸者為少質則是制禮之序此先彼後如冠禮之醴與醺者然也而上下篇以賓尸者為主至是乃更端言不賓尸者焉周禮尚文抑又可見是雖與冠禮言醴醺之序者不同意則相類也然既有新儀又存舊禮使夫人自擇而行之是又聖人至公無我之心固不專主於所尚而已

則祝侑亦如之

注曰謂尸七飯時

尸食

注曰八飯

乃盛俎臠臂肫脰脊橫脊短脅代脅皆牢

盛音成下同

注曰盛者盛於所俎也

繼公謂先正體而後脊脅亦以尊卑也前體先臠後臂者肩未舉若自下而上然此所取者三體四骨與

所舉正脊幹骼則羊豕各四體六骨矣肩既舉而俎  
但有六骨以為所釋者也

# 魚七

注曰盛半也魚十有五而俎其一已舉

繼公謂魚盛七并前所舉者一僅八而已牢之骨體  
已多此可以略特牲少故魚盛十有二

# 腊辯無髀

注曰亦盛半也言無髀者云一純而俎嫌有之

繼公謂前升腊於鼎俎時不云髀不升故此明之腊用一純故得取其半云辯者明右體及其脅與脊皆盛也腸胃膚不盛者以其於骨體為賤既取骨體則賤者略之可也

卒盛乃舉牢肩尸受振祭齊之佐食受加于所先盛衆骨體乃舉肩臠及於士禮亦為舉肩之後又實他俎不宜與所俎之事並行也

佐食取一俎于堂下以入奠于羊俎東

羊當作魚字之誤也

乃撫于魚腊俎俎釋三个其餘皆取之實于一俎以出

撫之  
石反

撫猶取也其餘謂三个之外者也魚撫四个腊撫八  
个其所釋者腊則短脅正脅代脅各一骨魚三个而  
已魚腊俎釋三个而牢俎六个者所俎於三脊三脅  
惟當各取一骨而已故牢俎之所釋不容不有六骨  
祝主人之魚腊取于是

注曰祝主人主婦俎之魚腊取於此者三者各取一魚其腊主人臂主婦臠不言主婦未聞

繼公謂此亦大夫之禮異者也取于是者主人主婦之魚腊及祝之魚也祝俎之腊用髀儗與不儗同耳

尸不飯告飽主人拜侑不言尸又三飯

飯並符晚反

惟云主人拜侑省文

佐食受牢舉如儗

注曰舉肺脊



繼公謂此儗者賓之之謂蓋指賓尸之禮也惟言賓則意有所不備故以儗言之經先見儗禮已有成文故此以如蒙之省文耳不言如初者見是禮元不在儗禮後也

右不賓尸尸食之禮

主人洗酌醕尸賓羞肝皆如儗禮卒爵主人拜祝受尸爵尸答拜

自卒爵以下不蒙如儗禮者欲與後禮相屬也凡與

饋禮同而重見之者其意皆然

右主人醑尸

祝酌授尸尸以醑主人亦如饋

此與上文所謂饋者皆前篇室中之事初非饋禮乃以饋為文者以其已入饋之節內故爾下文放此其換祭其餼亦如饋

換亦當作授換去授字又差近也

右尸酢主人

其獻祝與二佐食其位其薦胥皆如儗

祝之薦胥如儗則牢與腊皆髀明矣祝於儗亦有肝  
從不言者與佐食連文故略之耳惟言位與薦胥不  
及其儀者可知也下文類此者皆然

右主人獻祝及佐食

主婦其洗獻于尸亦如儗

此如儗謂拜送爵以上之禮

主婦反取籩于房中執棗糗坐設之棗在稷南糗在棗

南婦贊者執栗脯主婦不興受設之栗在糗東脯在棗  
東主婦興反位

注曰反位反主人之北拜送爵位

繼公謂籩位自左而右綰之變於敦位也此饋食之  
禮則四籩者其饋食之籩與周官籩人職饋食之籩  
五有棗栗無糗脯蓋棗下脫糗栗下脫脯也天子諸  
侯饋食之籩亦八當與其豆數同此從獻之禮儼則  
闕之者詳於堂上故略於室中隆殺之宜也

尸左執爵取棗糗祝取栗脯以授尸尸兼祭于豆祭祭酒啐酒次賓羞牢燔用俎鹽在右尸兼取燔揅于鹽振祭齊之祝受加于所

注曰自主婦反取籩至此異于賓

卒爵主婦拜祝受尸爵尸答拜

右主婦獻尸

祝易爵洗酌授尸尸以醋主婦主婦主人之北拜受爵尸答拜主婦反位又拜上佐食綏祭如賓卒爵拜尸答

拜

此夾爵拜內子正禮也儗則略之綏亦當作授

右尸酢主婦

主婦獻祝其酌如儗拜坐受爵主婦主人之北答拜如儗其酌以前之禮

宰夫薦素糗坐設棗于道西糗在棗南祝左執爵取棗糗祭于豆祭祭酒啐酒次賓羞燔如尸禮

注曰自宰夫薦至此亦異于儗

繼公謂內子不薦而使官為之者遠下尸亦大夫禮異也士禮主婦薦豆籩於祝

卒爵主婦受爵酌獻二佐食亦如儉主婦受爵以入于房

祝卒爵而主婦受是亦不拜既如儉也此以上如儉者皆在前篇

右主婦獻祝及佐食

賓長洗爵獻于尸尸拜受賓戶西北面答拜爵止

此三獻爵止之義與特牲饋食禮同受爵而即止亦大夫禮異也

右賓長獻尸爵止

主婦洗于房中酌致于主人主人拜受主婦戶西北面拜送爵司宮設席

設席亦於主人立處之南也

主婦薦韭菹醢坐設于席前菹在北方婦贊者執棗糗以從主婦不興受設棗于菹北糗在棗西佐食設俎臂



脊脅肺皆牢膚三魚一腊臂

臂左臂也腊臂亦如之肺離肺也脊脅各一骨脊脅之數皆少者以俎實多故爾亦遠下尸也魚一亦橫之與牲腊異既設俎主人乃升筵坐與主婦升筵之節同

主人左執爵右取菹換于醢祭于豆間遂祭邊奠爵興取牢肺坐絕祭齊之興加于俎坐拱手祭酒執爵以興坐卒爵拜

此籩祭不贊且無從與士禮異者其辟尊者之禮與  
此牢肺則絕祭齊之者各一也亦卒爵于席者室中  
之禮已在席則宜卒爵于席不必於拜受之處成禮  
也

主婦荅拜受爵酌以醋戶內北面拜主人荅拜卒爵拜  
主人荅拜主婦以爵入于房

李寶之曰主人不致爵于主婦異於士

繼公謂主婦亦坐祭立飲而卒爵此文略也

右主婦致爵于主人

尸作止爵

注曰自爵止至此亦異於儗

祭酒卒爵賓拜祝受爵尸答拜

尸擯受爵而即止故於是祭之於三獻而無從與士  
禮異者其亦辟尊者之禮與

祝酌授尸賓拜受爵尸拜送坐祭遂飲卒爵拜尸答拜  
此賓受酢不夾爵拜而卒爵之儀又略以其間有爵

止之事既變於上故此儀亦不得同於主人是與賓少異者也

右尸作止爵酢賓

獻祝及二佐食

賓獻祝亦北面拜獻佐食亦西面拜與上篇此節獻祝不卒爵又不言獻佐食之禮此經文略也其或以主婦獻禮通之與特牲禮曰獻祝及佐食皆如初

右賓長獻祝佐食

洗致爵于主人主人席上拜受爵賓北面答拜坐祭遂飲卒爵拜賓答拜受爵

主人雖拜于席亦立受爵與祝異

酌致爵于主婦主婦北堂司宮設席東面

注曰賓致爵于主婦異於儼北堂謂立于北堂即所設席之北也特牲記曰宗婦北堂東面北上主婦之席北堂東面則在宗婦之北也亦異於儼此設席亦北上也賓尸之禮席主婦于房中南面主婦立于席

西是東上而上左也此禮設席雖變而東面亦宜上左也上左則北上也

主婦席北東面拜受爵賓西面答拜

席北上主婦乃拜于席北者以其先立於此故由便也不拜於席南者其以切近於宗婦長之位故與婦贊者薦韭菹醢菹在南方

以篇首設豆之例言之菹在南方則席北上明矣

婦人贊者執棗糗授婦贊者婦贊者不興受設棗于菹

南糗在棗東佐食設俎于豆東羊臠豕折羊脊脅祭肺  
一膚一魚一腊臠

豕折不言其所用之體未詳此肺臠羊肺也曰祭者  
誤衍爾豕折而腊臠者腊與牲並用則宜放其尊者  
主婦升筵坐左執爵右取菹換于醢祭之祭籩奠爵興  
取肺坐絕祭臠之興加于俎坐拱手祭酒執爵興筵北  
東面立卒爵拜賓荅拜賓受爵易爵于篚洗酌醋于主  
人戶西北面拜主人荅拜卒爵拜主人荅拜賓以爵降

奠于篚

易爵于篚亦下篚也自及佐食至此亦饋之所殺者其義與上同自是而後以至于末獻室中之事無復如饋者以內外之禮異故耳

右賓長致于主人主婦

乃羞宰夫羞房中之羞司士羞庶羞于尸祝主人主婦內羞在右庶羞在左

注曰不賓尸則祝猶脩耳



右羞于尸祝主人主婦

主人降拜衆賓洗獻衆賓其薦胾其位其酬醋皆如儗  
禮主人洗獻兄弟與內賓與私人皆如儗禮其位其薦  
胾皆如儗禮

注曰此與儗同者在此篇

繼公謂此禮長賓之俎其異於儗者無切肺耳

右主人獻賓以至于私人

卒乃羞于賓兄弟內賓及私人辯

卒謂皆獻畢也獻畢即羞之亦其節之異於饋者羞者羞庶羞

右羞于堂下及房中

賓長獻于尸尸醕獻祝致醕賓以爵降實于篚

注曰致謂致爵于主人主婦

疏曰此次賓長為加爵也

繼公謂此亦洗觶以獻與特牲兄弟長加爵之器同經見此禮之殺於上者惟爵不止與不及佐食耳餘

則略之以其可知故也此亦衆賓長也惟言賓長說見於前

右次賓獻致

賓兄弟交錯其酬無筭爵

李寶之曰此兄弟舉觶于其長亦當如儔禮在羞于私人之後賓長加獻之前文不具耳

繼公謂此亦儔不儔同不言如儔未詳特牲禮衆賓長以觶為加爵于尸爵止堂下乃舉觶而旅酬既作

止爵復旅酬遂行無筭爵大夫賓尸之禮賓一人舉  
觶于尸尸乃行酬徧及于下然後在庭者爵無筭以  
是二者觀之則庭中之行觶皆以尸用觶之時為節  
也此於衆賓長以觶加獻之後而賓兄弟乃舉觶以  
相酬而為無筭爵似非其節蓋此上之文不具者多  
矣固不止如李氏所云也

右賓兄弟相酬爵無筭

利洗爵獻于尸尸醑獻祝祝受祭酒啐酒奠之

奠之亦北面奠于其筵前也祭事將畢其禮漸殺衆賓長獻不及佐食故祝於此亦不終其獻以見已禮亦宜殺之意是亦異於士

右上利獻尸祝

主人出立于阼階上西面祝出立于西階上東面祝告于主人曰利成祝入主人降立于阼階東西面尸謖祝前尸從遂出於廟門祝反復位于室中祝命佐食徹尸

俎

祝反復位于室中主人亦入于室復位經有脫文也  
佐食乃出尸俎于廟門外有司受歸之徹昨薦俎  
徹昨薦俎亦佐食為之既徹昨俎則堂下俎畢出與  
特牲禮同也

右尸出祭禮畢

乃褻如饋

注曰謂上篇自司宮設對席至上餽興出也

右褻

卒褻有司官徹饋饌于室中西北隅南面如饋之設右

几牀用席納一尊于室中

牀扶  
味反

注曰官徹饋者司馬司士舉俎宰夫取敦及豆佐食  
不舉羊豕俎親餽尊也古文牀作第

繼公謂南面亦大夫禮異

司宮掃祭

注曰埽豆間之祭舊說云埋之西階東

繼公案舊說謂埋祭于西階東者據聘禮埋幣之處

而言也

右改設

主人出立于阼階上西面祝執其俎以出立于西階上東面司宮闔牖戶祝告利成乃執俎以出于廟門外有司受歸之衆賓出主人拜送于廟門外乃反

注曰拜送賓者亦拜送其長

婦人乃徹

言婦人乃為徹事也其事在下



徹室中之饌

室中之饌即改設者也婦人徹此饌者為其當以入于房與凡徹饌而以入于房者婦人乃得為之不然則否室中之饋改饌而闔牖戶自闔牖戶至此須臾之頃耳然則改饌之不為厭神益可見矣

右禮畢

儀禮集說卷十七

正誤

以羊鉶之柶扱羊鉶遂以扱豕鉶

鄭本扱作挹繼公案上經云以挹漬注曰今文挹皆作扱皆此經文也案士昏禮聘禮賓以柶祭醴二記皆云始扱一祭又公食大夫禮曰扱上鉶以柶辯擣之上鉶之間祭蓋以柶取物而祭則必扱之此亦以柶祭鉶也宜云扱與彼同不宜云挹當從今文

南面立于席西

鄭本無南面字注曰今文曰南面立於席西繼公謂  
宜從今文入南面字

其揅祭

鄭本揅作綏注曰綏古文為揅繼公謂此當云授祭  
綏揅二字皆誤也但揅於授字為尤近故宜取其近  
者

啐酒皆如尸禮

本云拜啐酒䟽曰或此經啐酒之上無拜文繼公謂

啐酒之上不當有拜今從疏之所謂或本者去拜字



禮古經十七篇其十三篇之後皆有記四篇則無之四篇者士相見大射少牢上下也然以意度之此四篇者未必無一記之可言或者有之而亡逸焉爾夫記者乃後人述其所聞以足經意者也舊各置之於其本篇之後者所以尊經而不敢與之雜也

漢藝文志言禮經與記各自為篇數是班

固之時經記猶不相合也今乃各在其本篇後者其鄭氏置之與

朱子作儀禮通解乃

始以記文分屬於經文每條之下謂以從簡便予作集說而於此則不能從也予非求異於朱子也顧其勢有

所不可耳何以言之儀禮諸篇之記有特為一條而發

者

如士冠記云始冠之緇布冠之類是也

有兼為兩條而發者

如聘記云大夫來使

無罪饗之過則餽之是也

亦有兼為數條而發者

如冠記云適子冠於阼以著代也醺

於客位加有成也云云之類是也

亦有於經意之外別見他禮者

如鄉射記言君

射之禮士冠記言無大夫冠禮而有其昏禮士昏記言壻見妻父之類是也

若其但為一條

而發者固可用通解之例矣非是則未見其可也何則

通解之書規模大而篇數繁其記文有不可附於本篇

每條之下者則或於其篇末見之否則於他篇附之故



雖未必盡如其所謂以從簡便之說而其於記文亦皆包括而無所遺也然以記者之意攷之則亦不為無少異矣予之所撰者但十七篇之集說耳若亦用此法則其所遺者不既多乎故不若仍舊貫之為愈而不敢效朱子通解之為也魯人所謂以吾之不可學柳下惠之可者吾有取焉爾夫豈敢有求異之意哉且夫易之為書也更四聖而后成伏羲畫卦爻文王周公作卦爻之辭孔子作文言彖象之辭其始也四聖之書或前或後

各居一處不相雜也後世學者乃各分而合之以從簡便及至朱子復釐正之以復古經之舊夫文言與彖象之辭可以附於每卦每爻之下者也朱子猶且正之蓋不欲其相雜也而況此記之文有不可盡入於本篇每條之下者乎由是言之則予之不敢用通解之法也亦宜矣又何足怪焉大德辛丑仲秋望日長樂教繼公書

謹案第一頁前四行有司徹第十七刊本徹字脫

今增

第九頁前八行麴芳中反刊本中字闕據經典釋

文補

第五十頁後五行乃以儻為文者刊本為訛其今


改

第五十一頁後六行有棗栗無糗脯刊本無訛而

今改

欽定四庫全書





覆校官檢討臣李學錦

校對官檢討臣龔大萬

謄錄監生臣朱懷玉